

Cussagl da cumün

Protocol nr. 19 da ls sezzüda dals 15 december 2009

Prescripziuns executivas taxas da cura e da promoziun dal turissem

La pratcha ha muossà cha'l termin per la taxa da cura nu saja adattà (inviern: 1. november fin 30 avrigl e stà: 1. mai fin 31 october). Sün proposta da la Ftan turissem decida il Cussagl da müdar l'artichel 1 da las prescripziuns executivas sco segua:
stagiun d'inviern: dals 1. december fin als 30 avrigl
stagiun da stà: dals 1. mai fin als 30 november
Quist müdamaint aintra in vigur per subit.

Immundizchas, fermativas

Sün giavüsch da plüs affarists ha il Cussagl reponderà illa sezzüda dals 24 november la decisiun a regard las fermativas. El ha decis da gnir incunter e da spordscher amo trais fermativas implü chi's rechattan sülla ruta. Quista decisiun tils es gnüda comunicada per scrit. Els nu sun perinclets cun quella decisiun e pretendan da-nouvmaing üna reponderaziun da la decisiun. Lur proposta es, d'avair amo plüs lös chi nu's rechattan però sülla ruta da l'allontanamaint. Il Cussagl decida da nu revgnir plü sülla decisiun dals 24 november. Tenor quai vaina fermà ourasom la via da Sainas (il lö es gnü scleri ed approvà da l'uffizi da construcziun bassa), pro l'hotel Bellavista e pro l'hotel Engiadina.

Via da l'Institut, mür da sustegn

Il mür da sustegn visavi a la chasa da sar Ruedi Späni ha subi dons pervi da relaziuns da clima e da naiv extraordinarias d'ürant l'ultim inviern. Ils cuosts per refar ils dons d'eiran calculats cun fr. 5'000.-- (decisiun dal Cussagl dals 21 avrigl 2009). Las lavuors sun gnüdas fattas in october. Ils cuosts effectivs per la lavur sun cun fr. 12'000.-- blerun plü ots co previs. Sar Ruedi Späni chi d'eira il patrun da fabrica dal mür es pront da contribuir ün import voluntari da fr. 6'000.-- vi da la sanaziun dal mür.

Tonnascha vias in cumün

La via chantunala da Scuol - Ftan e tras cumün fin pro la piazza da trans-s-chargiar in Nuis-chel es transibla cun veiculs fin 32 tonnas. Il Cussagl discuta la pussibilità da dar liber la tonnascha da 32 tonnas eir sün vias cumünalas. Üna differenza da la tonnascha tanter la via chantunala e las vias cumünalas es fich difficila a controllar. Perquai decida il Cussagl da dar liber las vias chi's rechattan i'l territori abità sün 32 tonnas.

Senda Quadras

Plüs abitants da Ftan Pitschen han suottascrit üna charta per exprimer il giavüsch cha la senda da Quadras resta transibla per peduns. Il Cussagl sustegna quist'idea e pissera cha'l possessur da terrain metta ad ir la senda. Il dret da passagi per peduns es inscrit i'l cudesch fundiari.

Rakettas e petardas

Üna votanta giavüscha al Cussagl da sclerir schi nu saja pussibel da scumandar il laschar ir da rakettas e petardas al Silvester ed als 1. avuost. Il Cussagl s'es consciaint cha la canera saja tant per bes-chas chasanas sco eir per la sulvaschina ün grond disturbi. Da relaschar ün scumond general sarà difficil, il Cussagl stübgia però pussibilitats per redüer il disturbi sül minimum.

Il capo: sig. Reto Pedotti

L'actuar: sig. Andri Florineth

publichà als 22/12/2009